



ილიას სახელმწიფო უნივერსიტეტი



საქართველოს პარლამენტის
ჯივნიანი ბიბლიოთეკა

ეზრა ათონელი

წმიდისა მამისა
ჩუენისა იოანე
ქართველისაჲ,
რომელმან აღაშენა
მთაწმიდას დიდი
ლაურაჲ
ქართველთაჲ

ეზრა ათონელი

წმიდისა მამისა ჩუენისა იოანე ქართველისაჲ,
რომელმან აღაშენა მთაწმიდას დიდი ლავრაჲ
ქართველთაჲ

წმიდისა მამისა ჩუენისა იოანე ქართველისაჲ, რომელმან აღაშენა მთაწმიდას დიდი ლავრაჲ ქართველთაჲ

ახალი შუენიერებაჲ ეკლესიასა ქრისტჳსსა დღესასწაული შენი, მამაო იოანე, ბრწყინვალედ შეუმოსიეს დღეს და ყოველთა ახარებს ახალსა სიხარულსა, რამეთუ შეერთებულ ხარ წმიდათა მწყობრსა ძისა შენისა თანა და ერთობით იხარებთ წინაშე ღმრთისა, მეოხ გ[უე]ყვენით სულთა ჩუენთათჳს! უღელსა ტკბილსა ქრისტჳსსა ქედი შენი მოუდრიკე და მიუდრეკელად წარჰმართენ სლვანი შენნი ზეცისა სუფევისა მიმართ, მამაო იოანე, და ურნატი სულისაჲ შრომათა შენტა ოფლითა განაპოხენ შენ და ნაყოფი კეთილი გამოიღე და მართუ უფალსა შენსა, რომლისაგან ნიჰნი მოგეცნეს! განაბრწყინვენ ჟამნი შენნი კეთილად მოღუაწებითა, რაჟამს ყოველივე დიდებაჲ ქუეყანისაჲ დაუტევე, ღმერთ- შემოსილო მამაო იოანე, და ღმერთი შეიყუარე, სიმდიდრე წარუპარველი, რომლისა მიერ იდიდე საუკუნოდ; მისა მიმართ მეოხ გუეყავ, რომელნი დღეს ჳსენებასა შენსა ვადიდებთ...

დიდებაჲ მსოფლიოდ განხრწნადი დაუტევე იწროსა მას გზასა მავალ-ჰყვენ ფერჳნი შენნი, მამაო იოანე, ხოლო უცხოებაჲ გექმნა შენდა წინამძღურად გზისა მის ჰემმარიტისა, და სავანედ შუენიერად მიიწიე მაღლისა სიმდაბლისა და საშუებელად ჰჰოე მორჩილებაჲ უზაკუველი, წმიდაო, რომელთა მიერ აწ აღიწიე ღირსო სრულსა სისრულესა ზეცისა სუფევისასა, მომიჳსენენ ჩუენ მადიდებელნი შენნი!

ყოველნი ღირსად შეგასხამთ დღეს, იოანე, გალობითა და შესხმითა სულიერითა ძისა შენისა თანა, ნეტარისა ეფთჳმესი, რამეთუ იქმენ ჰემმარიტად შვილსა ზედა სახარულევან, რომლისა მიერ განამრავლენ შვილნი უდაბნოდსანი და წიგნნი სულიერნი დაუუნჯენ ეკლესიათა ჩუენთა და აწ პირმშოსა მას ზეცათა სიონსა ერთობით იხარებთ წინაშე სამებისა წმიდისა, მეოხ გუეყვენით მადიდებელთა თქუენთა! მოვედით, ჰ მწყობრნო მგალობელთანო, და განვაწყოთ ჩუენ ხოროდ ტაძარსა შინა

ღმრთისა დედისასა და ვადიდებდეთ ქრისტესა ღმერთსა, რომელმან გამოაჩინა ნეტარნი ესე და მკნენი მოლუაწენი, იოანე და ეფთჳმი, რომელთაცა აღაშენეს ლავრაჲ ესე დიდებული და წმიდაჲ ეკლესიაჲ, რომელსა შინა მდგომარე ვართ და სურვიელად აღვასრულებთ დღესასწაულსა მათსა და მათ მიერ ვითხოვთ ქრისტესგან მოტევებაჲ ცოდვათაჲ და კსნაჲ განსაცდელთაგან და სულთა ჩუენთა დიდი წყალობაჲ. სათნოებითა განჰმდიდრდი, მამაო, და უფროჲს ყოველთასა სიგლახაკე შეიყუარე და უცხოებასა მიეც თავი შენი და ჰმწირობდ, ვითარცა რაჲ მამათმთავარი, ხოლო განმადლიერებელმან შენმან ქრისტემან ღმერთმან გამოაცხადნა სიმკნენი ლუაწლთა შენთანი და განჰფინნა ყოველთა კიდეთა სოფლისათა; ამისთვისცა იხარებს კრებული ქართველთაჲ და იქადიან შენთთვის და განსცხრებიან სიხარულით განსწავლულნი ძისა შენისაგან. არამედ, ჰ ნეტარო მოლუაწენო და ყოვლად ქებულნო მამანო, იოანე და ეფთჳმი, სამკაულნო და საქადულნო ნათესავისა ჩუენისანო, ევედრენით ქრისტესა ღმერთსა, რათა ცოდვათა შენდობაჲ მოგუანიჭოს, რომელნი სურვილით ვდღესასწაულობთ საკსენებელსა თქუენსა...

მოგუხედენ მალლით, ღმერთ-შემოსილო, და დააცხრვენ აღძრვანი უხილავთა და ხილულთა ვნებათანი, გარე წარგუჳადენ განსაცდელნი და ეშმაკთა კუეთებანი სამწყსოთა ამათ შენთა და მგალობელთა, მდგომარეთა წინაშე სამარხოსა ნაწილთა შენთასა, და შეწირე ვედრებაჲ ჩუენი დედასა თანა ღმრთისასა წინაშე ქრისტესსა თანაშეწევნითა ზეცისა მკედრობათაჲთა და წინამორბედისა და იოანე ღმრთის-მეტყუელისაჲთა, სანატრელო ეფთჳმი, სოფლისათჳს მშჳდობაჲ ითხოვე!

იწრო არს ჩემდა, ნეტარო იოანე, ყოვლით კერძოვე შესხმად შენდა ჳელყოფად, არამედ ვხადი ყოვლისა შეძლებულსა ოხასა შენსა, რათა მომეცეს სიტყუაჲ აღებასა პირისა ჩემისასა. დასაბამსავე სოფლით გამოსლვისასა დასაბამი სიბრძნისა, შიში ღმრთისაჲ გულისჳმა კეთილ, რომლითა

მოიძულე საწუთროჲ ესე, მამაო იოანე, აღილე ჳუარი და შეუდეგ

ქრისტესა! იქადის ტაოდ, ქუეყანად იგი თქუენი, თანა-მკვდრითურთ თქუენტვს, ყოვლად ქებულნო, რამეთუ მიერ აღმოსცენდით, წმიდანო, იოანე და ეფთჳმი სანატრელნო, და განანათლეთ ნათესავი ქართველთაჲ. და-რად-ემკვდრა შენ თანა მადლი ღმრთისაჲ, მოგაძულა შენ საწუთროდსა დიდებად, და შეიყუარე სიმდაბლე, უცხოებაჲ, რომლისა მიერ აღიწიე სიმაღლედ სასუფეველისა, წმიდაო იოანე! ევაძს ცთომითა სიკუდილი დაგუესაჯა, ხოლო შენ მიერ, წმიდაო ღმრთისმშობელო, ცხორებაჲ ვპოვეთ, რამეთუ ღმერთი გვშევ, მადიდებელი აღმსაარებელთა შენთაჲ და ღირსთა თვსთა გვრგვნოსან მყოფელი! ბრწყინვალეებითა მადლითა შენისაჲთა განგუანათლენ მადიდებელნი შენნი, ღმერთ - შემოსილო მამაო იოანე, რათა ვაქებდეთ დღესასწაულსა შენსა განათლებულსა და ღირსსა ქებისასა!

უცხოებამან შენმან, ღმერთ-შემოსილო, და სივლტოლამან კაცთა დიდებისამან, დაგადგინა შენ სასანთლესა მაღალსა, რათა ჰნათობდე სათნოებათა შენთა ელვარებითა ყოველთა ცის-კიდეთა! დავიწყებისა მიზეზი არს სიკუდილი, ხოლო შემდგომად სიკუდილისა შენისა მაუწყებელ არს მოლუაწებათა აწ ლავრაჲ შენი და ჰმა-მაღლად ქადაგებს შრომათა შენთა, მამაო იოანე! ერჩიდი ნებასა მამისა შენისასა, ბრძენო ეფთჳმი, და კეთილად განაგენ სამწყსონი შენნი, მის მიერ რწმუნებულნი შენდა, მამაო, და წესი სულიერი შემდგომთა ბრწყინვალედ დაუტევე! ნეტარებასა ძისა შენისა მიერ ღირს იქმნებიან აღმსა[ა]რებელნი შენნი დედად მხსნელისად, და ნეტარ არს, რომელმან იცის გალობაჲ და ჯეროვანი შესხმაჲ შენი, ქალწულო, ყოველთა დედოფალო!.. იხარებს ღირსად ბანაკი მონაზონთაჲ შენთვს, წმიდაო მამაო იოანე, რამეთუ სიმკნე დიდი შესძინე მათ და სირცხვლითა აღსავსე არს ეშმაკი, მოლუაწეთაგან დამკობილი სრულიად. სამნაურთაგან ამის საწუთროდსათა განრომაჲ ჩუენი ილუაწეთ, მოლუაწენო ქრისტეს ღმრთისანო, რომლისაგა წინაშე კადნიერებით მდგომარე ხართ, მამანო იოანე და ეფთჳმი სანატრელნო!

მხიარულებით სულეებმან მართალთამან შეიწყნარეს დღეს სული შენი

უბიწოდ, რომელთა შორის იშუებ, ღმერთ-შემოსილო! საწადელისა შენისა ქრისტეს თანა მომიკსენენ ჩუენ მადიდებელნი შენნი! ითხოვე, ღირსო, ყოვლისა სოფლისათჳს მშჳდობით დაცვაჲ და მეფისა ჩუენისა[თჳს] ძლევაჲ და დამტკიცებაჲ მართლ-მადიდებლობისაჲ ქრისტეს ღმრთისაგან, წმიდაო იოანე, და სულთა ჩუენტა[თჳს] უხუად დიდი წყალობაჲ! ეკლესიაო ქრისტესო, იხარებდი და შეიწყნარე დღესასწაული ესე ყოვლად ღირსისა იოანე მართლისა და საკსენებელად საუკუნოდ დაჰმარხე და ახარებდი წლიითი-წლად შვილთა შენთა! რომელმან უტყჳენაჲ ჩემი მეტყუელ-ჰყავ გალობად შენდა, მამაო იოანე, შენ შეიწირე გულს-მოდგინებაჲ ჩემი და მოტევებაჲ ცოდვათაჲ მითხოვე მე ქრისტეს ღმრთისაგან, შემსხმელსა ამას შენსა! შიში მერმისა საშჯელისაჲ განმლევს მე, რამეთუ უწყი სიმრავლე ბრალთა ჩემთაჲ, ღმრთისა დედაო, პირველ აღსასრულისა ღმობიერებაჲ ჯეროვანი მომმადლე, რათა განვერე მე მერმისა რისხვისაგან!